

اسألوا يمام: بلا مزح!

كيف تردين على نكتة سمجة

يمام



يستضيف قسم جنوسة في الجمهورية.نت، ولدة غير محددة، المحررة يمام التي تطوعت للرد على رسائل قرائنا الكثيرة حول مواضيع مختلفة متعلقة بالقسم.

اشترطت علينا يمام عدم إجبارها على أن تكون أجوبتها صائبة دوماً في هذا التمرين الإعلامي الصحفي الصعب الذي زججناها فيه. مع ذلك، سنحاول أن نؤطرها قدر المستطاع صوابياً لمعرفةنا بأنها تحاول دائماً إيجاد أجوبة لأسئلتنا وأسئلة قرائنا، رغم أنها أحياناً تطرح أسئلة أكثر من السؤال الأصلي. نطلب من قرائنا الجرأة إذ لا حياء في العلم، ولكن كذلك الرفق في أسئلتهم.

وصلنا من السيدة م.س التي لم ترغب بذكر اسمها أو مكان إقامتها، السؤال التالي: «غالباً ما أشعر بالشلل للحظات حين أتعرض ل'مزحات' سمجة ذات

طابع جنسي. بعد الشلل وبعد انقضاء الموقف، أشعر بالغيظ الشديد والقهر كيف لم أتمكن من الرد. أتمنى أن تعطيني يمام بعض النصائح كي أتصرف بسرعة، وأتجنب الشعور بالقهر والإهانة فيما بعد». وجَّهنا السؤال ليمام، وفيما يلي رُدُّها:

بما أنو صاحب/صاحبة السؤال ما ذكرت اسمها أو اسمو، رح أفترض إنها سيدة أو شخص من ميول جنسية ممكن يكون عرضة لهالنوع من المواقف. أكيد مضمون النكتة السمجة المهينة رح يتغير شوي بين الحالتين، ولكن بتوقع أنو الأثر نفسو والنصيحة تقربياً نفسها، بس رح أنطلق من تجربتي الشخصية كسيدة بالدرجة الأولى.

قبل كل شي لازم نميز بين شغلتين، إذا كان المقصود هو نكت أو قفشات بين رجال، وعلى فكرة من مختلف الفئات مثقفة وغير مثقفة، نكت فيها كره للنساء أو إهانات مو شرط جنسية حتى، ولكن من نمط مثلاً أنو فلان جايتو الدورة، مقفعة معو ما عم يتحاكي، أو هالآلة بدك تجيها بالضرب، أو بالأخذ والعطا، مثل المرا، أو أي نوع من التلميح القذر تجاه جنس مختلف مثلاً. هادا شي بيقولولو باللغة النسوية «التنشئة الاجتماعية بالتواطؤ بين الذكور»، يعني هو متل طقس يعطي شعور عالي بالرضا عن الانتماء لمجموعة وحدة إلها امتيازات اجتماعية. وهالنوع من المزح والتبادل بين الذكور هو تذكير مستمر بيناتهم بامتيازهم، وبالتالي دعوة للتمسك فيها. تكرارها هو تكريس إلها لتصير عادية، والأخطر بالموضوع هو صيغة المزح أو الضحك، السخرية بهالحالة هي سلاح التطبيع القاتل. شو لازم عملي بهالحالة، إذا كنت بهالجلسة اللي عم ينحكي فيها هيك شي؟ تعطيهم درس عن التواطؤ الذكوري؟ ما بنصحك أبداً، لأنو تهمة الهسترة حاضرة إللك دائماً، تتركي الجلسة وتمشي وتقولي ما في شي بيضحك؟ ما بعرف، برأي المتواضع في واحد من حلين: إما تكون نكتك المضادة، الساخرة من اللي حكى النكتة، حاضرة على راس لسانك بدقيقة الوقت كتتمه لمزحتهم وتضحكوا سوا، ساعتها سلاح السخرية اللي بيميع الأمور بيزحلقيهم وبيخليهم يضطروا يضحكوا، لأنو قررتي تستعملي نفس الكود اللي هن متفقين عليه، أو الحل الثاني هو التظاهر بالبلاهة التامة وعدم فهم الضحك، ساعتها بتكوني فهمتهم كمان بطريقة غير مباشرة وغير واعية أنو كمان الامتياز اللي عم تتغامزوا عليه غير بديهي وغير مفهوم.

بس في نوع ثاني من التلميحات والسماجات الجنسية المباشرة. يمكن أني بتقصدي هي النكت؟ مثلاً، زميل بالشغل يفوت لعندك على المكتب ويسكر الباب ويقلك: «بعرف ما عندك مانع بتسكير الباب» ويغمزك، أو مثلاً يحكي كلام بذيء ويطلع فيك ويقلك: «ما في كلفة بيناتنا» أو «بعرفك ناضجة وبتقبلي هيك حكي». شو لازم

يكون الجواب يا ترى بهالحالة، لحتى ما تنقهرى بعد كم يوم أنو كيف ما رديت عليه؟
الجواب صعب، كل شيء بيتوقف على مواقعكم والسياق اللي أنتو فيه. إذا كان
سياق بيسمح بشي بيسموه بالمنظور النسوي «مقاربة المحاسبة الدائمة»، بتقدرى
تنذريه بطريقة رسمية، ولكن إذا كنتوا بسياق ما فيه ريحة المحاسبة لهيك أشياء،
فردّة فعلك بتتوقف على شخصيتك وقدرتك على التحمل ونتائج الموقف، وهالشى
بيتراوح بين أنك ما تردي وتنشفي تماماً، لردود مجنونة أكثر مثل أنك تقوليلو مثلاً
كنوع من الهزة والتهكم عليه: «ما صارت ساعة إرضاع الكبير، وقت تصير بناديلك»
وبتنشفي بوجهو لينصب... بعرف نصيحة مو بمكانها تماماً، بس الحقيقة شي
بيطلع عن الطور.